

N grum de rencontres culturai a Moena

Va inant enschin ai 7 de aost la rassegna de evenc per cognoscer scritores e personajes del panoram leterèr talian

Ence chest an Moena, per endrez del Comitat Moena Evenc, ge sporc a ghesc e jent dal post l met de scontrèr desvalives personajes del panoram leterèr e cultural nazonèl con i apuntamenc de “Moena Encontres”.

A averjer la lingia de scontrèdes l'è stat Valentina Musmeci l'autora trentina del liber “Il bracconiere, vegnù fora de november del 2018 a cura de La Grafica Editore. L liber, portà dant con la moderazion de Virna Pierobon, l roda dintorn l percors de vita e la esperienzes de persones de la generazion del 1968, vedudes en prospetiva individuèla ma ence sozièla.

Musmeci è na insegnanta, l'à viajà e fat fotografies per siti e revistes de viac. La é fondadora de la sociazion Falenablu, che sostegn la realizazion de ativitèdes artistiches e educatives contra la violenza su la femena. Falenablu colaborea col MART, l Museo de èrt moderna e contemporana de Trent e Rorei.

Per chel che vèrda i etres apuntamenc, en mercol che vegn ai 10 de messèl da les 9 da sera te sala de consei de comun sarà Davide Bubani che rejonarà de “Il sognatore

ribelle”, n liber che conta de Tomasz Mackewicz, n alpinist fora dai schemes che zenza nesciuna esperienza de l'Himalaya l se à enamorà de n ensomech, l Nanga Parbat da d'invern.

Tel chèder de la rassegna “Ispirazions d'istà”, en jebia ai 25 de messèl semper da les 9 da sera te teater Navalge, Tamara Lunger contarà sia straordenèra esperienza de alpinista e sie percors de crescimonia culturala, de coche mond sportif e mond spirituèl convif e se enterza te sia persona.

De aost, ai 2 da les 6 domesdi ti vidores de Strada Loewy vegnarà metù a jir n event cultural su la fègura de Luigi Heilmann, sentadin onorèr de Moena, e su sia femena Marcella, autora del liber “Moena nel cuore”, te chel che l'à contà la Moena de n temp. Dò vegnarà logà n recort en memoria e sarà n moment convivial con la musega del quartet Demò Ousc.

L'ùltim apuntament l'è en program en mercol ai 7 de aost da les 9 da sera te sala de consei de comun col scrittor Rosario Sala. Motoziclist per pascion, l'autor ogne an fèsc viajes envers desvaliva

destinazions per didèr la popolazions più puretes che l scontra sun sie percors. Tel liber “Alla scoperta dell'Asia in sella a una moto” l conta de l'esperienza vivuda endèna l viac da soul da Trent a Hanoi e l portarà dant l'avventura che vegn, da Cape Town a Trent.

CRI.M



La soracuerta del liber de Marcella Heilmann.